

Visoki predstavnik preduzeo mjere kako bi oslabio mrežu koja pruža pomoć Karadžiću

Visoki predstavnik Paddy Ashdown je u petak pokrenuo kampanju u cilju slabljenja mreže koja proteklih sedam godina omogućava optuženom ratnom zločincu, Radovnu Karadžiću, da izbjegava hapšenje.

Nakon donošenja izmjena i dopuna bankarskih zakona na državnom i entitetskom nivou u cilju omogućavanja Agencijama za bankarstvo da blokiraju sredstva i zabrane daljnje transakcije pojedinaca i preduzeća koja opstruiraju Dejtonski mirovni sporazum, Visoki predstavnik je ustanovio da Momčilo Mandić i Milovan Bjelica te dva preduzeća Manco Oil i Privredna banka Srpsko Sarajevo vrše opstrukcije.

Banke sada imaju zakonsku obavezu da osiguraju zamrzavanje bankovnih računa ove dvije osobe i ovih preduzeća. Moguće kaznene mjere protiv banaka koje ne budu poštivale ovu obavezu uključuju i ukidanje dozvole za rad.

“Danas je međunarodna zajednica proglasila Momčila Mandića i Milovana Bjelicu osobama koje su prekršile finansijska pravila zbog toga što su djelovali kao pomagači Radovana Karadžića i što su ometali izvršenje pravde” rekao je Visoki predstavnik na konferenciji za novinare. Visoki predstavnik je rekao da je Mandić, poznati ratni profiter, financirao Karadžića, dok je Bjelica koji je povezan sa trgovinom oružjem, švercom i iznuđivanjem, djelovao kao Karadžićev posrednik sa vanjskim svijetom. U zasebnoj Odluci koja je izdata u petak Visoki predstavnik je smijenio Bjelicu sa funkcije predsjedavajućeg Skupštine općine Srpsko Sarajevo.

Od danas će svi bankovni računi koji se vode na ime ovih osoba i preduzeća biti zamrznuti i prebačeni u Centralnu banku. Ove

osobe i preduzeća neće moći otvoriti nove bankovne račune niti izvršiti bilo kakvu bankovnu transakciju u Bosni i Hercegovini. Ove osobe i preduzeća više u svoje ime ne mogu ni poslovati u BiH. Sve osobe koje obavljaju transakcije u njihovo ime će takođe biti na spisku osoba protiv kojih će se poduzeti mjere.

Visoki predstavnik je napomenuo da je mreža koja pruža podršku Karadžiću "na različite načine uzimala novac od građana Republike Srpske a posebno putem kriminalnih radnji, korupcije u javnim preduzećima i utaje poreza." Visoki predstavnik je rekao da aktivnosti ove mreže onemogućavaju zadovoljenje pravde za građane BiH, a Bosna i Hercegovina je i dalje njihov taoc.

"Da bi pravda bila zadovoljena Karadžić mora otići u Hag", rekao je Visoki predstavnik. "Karadžić mora otići u Hag ukoliko Republika Srpska želi da odbaci svoju međunarodnu reputaciju utočišta za ratne zločince i organizirani kriminal – reputaciju koja je do sada odbijala investitore i onemogućavala otvaranje novih radnih mjesta koja su prijeko potrebna Republici Srpskoj."

On je ljude oko Karadžića opisao kao "prokletstvo" nad Republikom Srpskom. "Oni su svojim aktivnostima zapravo dva puta opljačkali građane Republike Srpske. Prvo, putem svojih kriminalnih radnji, a drugi put time što su onemogućili ulaganja u RS koja su potrebna za otvaranje novih radnih mjesta i osiguranje prosperiteta."

Visoki predstavnik je rekao da inicijativa koja je pokrenuta u petak nema za cilj utvrđivanje krivične odgovornosti. "O tome će odlučivati sudovi", rekao je Visoki predstavnik. "Ove aktivnosti imaju za cilj da na vrlo očigledan i praktičan način razbiju mrežu koja pruža podršku Karadžiću. Ukoliko želite uništiti takvu otrovnu biljku morate je iščupati iz korijena. Ove aktivnosti imaju za cilj da Karadžiću otežaju skrivanje i bijeg. Ove aktivnosti takođe predstavljaju i upozorenje. Upozorenje svima onima koji takođe pomažu

Karadžiću da ostane na slobodi. Ovo je početak, a ne kraj procesa. Ukoliko ste dio mreže koja pomaže Karadžiću počnite razmatrati opcije koje su vam na raspolaganju. Odmah odlučite da više ne budete dio te mreže, ili ćete se kasnije morati suočiti sa posljedicama.”